

**CONVENIO DE COLABORACIÓN ENTRE O INSTITUTO GALEGO DE PROMOCIÓN ECONÓMICA,
A UNIVERSIDADE DE VIGO E A FEDERACIÓN GALEGA DE MUNICIPIOS E PROVINCIAS PARA A
REDUCCIÓN DAS CARGAS ADMINISTRATIVAS NO EXERCICIO DE ACTIVIDADES ECONÓMICAS E
DE SERVIZOS NOS CONCELLOS DE GALICIA**

Santiago de Compostela, 1 de outubro de 2019

CONVENIO DE COLABORACIÓN ENTRE O INSTITUTO GALEGO DE PROMOCIÓN ECONÓMICA, A UNIVERSIDADE DE VIGO E A FEDERACIÓN GALEGA DE MUNICIPIOS E PROVINCIAS PARA A REDUCIÓN DAS CARGAS ADMINISTRATIVAS NO EXERCICIO DE ACTIVIDADES ECONÓMICAS E DE SERVIZOS NOS CONCELLOS DE GALICIA

Santiago de Compostela, 1 de outubro de 2019

REUNIDOS

Dunha parte, Juan Manuel Cividanes Roger, en representación do Instituto Galego de Promoción Económica (Igape), con CIF Q 6550010J e domicilio en Complexo Administrativo de San Lázaro s/n 15707 Santiago de Compostela (A Coruña). Está facultado para este acto en virtude da delegación de facultades do 23 de decembro de 2016 do Presidente do Igape feita pública mediante Resolución do 25 de xaneiro de 2017 (DOG nº 23, do 2 de febreiro de 2017).

Doutra parte, Manuel Joaquín Reigosa Roger, Reitor Magnífico da Universidade de Vigo (CIF Q8650002B), nomeado segundo o Decreto 59/2018, do 31 de maio, de acordo coas competencias que lle outorga o artigo 20 da Lei orgánica 6/2001, do 21 de decembro, de Universidades, e o artigo 58 dos Estatutos da Universidade de Vigo, aprobados polo Decreto 7/2010, do 14 de xaneiro, e con enderezo en Edificio Reitoría, Campus universitario, 36310 Vigo.

E doutra parte, Alfredo L. García Rodríguez, presidente da Federación Galega de Municipios e Provincias (FEGAMP) (CIF V-15160963) actuando en nome e representación daquela, no uso das facultades que lle son atribuídas polo artigo 46 dos Estatutos da FEGAMP, aprobados pola Asemblea Xeral ordinaria do 4 de decembro de 2003 e en virtude do seu nomeamento pola Asemblea Xeral do 30 de outubro de 2015.

As partes comparecentes recoñécense mutuamente plena lexitimación, capacidade e representación para a sinatura do presente convenio e, a estes efectos

EXPOÑEN

Primeiro.- A Lei 9/2013, do 19 de decembro, do emprendemento e da competitividade económica de Galicia, establece entre as súas finalidades e obxectivos, a necesidade de que as administracións públicas traballen medidas concretas para fomentar o emprendemento e para apoiar ás persoas emprendedoras como axentes dinamizadores da economía en Galicia, como consecuencia do alto grao de representatividade das pequenas e medianas empresas, determinantes do crecemento económico e soporte para a creación de emprego.

Neste sentido, o Igape como Axencia de Desenvolvemento Rexional de Galicia, e como ente de dereito público con personalidade xurídica e patrimonio propios, ten entre os seus principais obxectivos os de fomentar a creación de novas empresas, promover a mellora da produtividade e competitividade das sociedades xa asentadas na Comunidade Autónoma, atraer investimentos foráneos, facilitar a internacionalización do tecido produtivo, así como facilitar ás empresas servizos de asesoramento, planificación, xestión, financiamento, formación, localización, seguimento e, en xeral, calquera outro que poida contribuír á súa creación e desenvolvemento.

Así mesmo, a disposición adicional segunda da dita lei, dispón que o Igape terá a consideración de entidade instrumental do sector público autonómico con competencias en materia de emprendemento.

Segundo.- A Universidade de Vigo é unha entidade pública con personalidade xurídica propia e plena capacidade de obrar, que xa está a colaborar cos concellos a través de varias actuacións destinadas a fomentar e a favorecer o seu desenvolvemento económico.

Así mesmo, ao longo dos últimos anos ten levado a cabo numerosas investigacións, publicacións e xornadas formativas en materia de desenvolvemento local que están a ser de grande utilidade nas entidades locais galegas.

Así, conta cun grupo de expertos de gran experiencia e un importante coñecemento do escenario local en xeral e galego en particular. Trátase do grupo de investigación GEN (*Governance and Economic research Network*) que desenvolve a “Red Localis”, Rede Local de Administración Pública, integrada por expertos recoñecidos no eido local, tanto do ámbito universitario como profesionais en exercicio.

Terceiro.- A FEGAMP, de acordo co establecido no artigo 6 dos seus Estatutos, ten entre os seus fins a representación e defensa dos intereses das entidades locais, a promoción das competencias locais e calquera outro fin que afecte ou incida de xeito directo ou indirecto nos seus asociados. Con esta finalidade, e de acordo co artigo 8 dos seus Estatutos, goza de plena capacidade para subscribir convenios e contraer compromisos e obrigas.

Cuarto.- Dada a experiencia e as capacidades que ten acumuladas a Universidade de Vigo na materia, o Igape ten especial interese en colaborar con esta entidade en aras a mellorar a competitividade e o emprendemento do tecido empresarial galego mediante a redución das cargas administrativas para a creación de novas iniciativas e o crecemento das xa existentes.

Quinto.- Polos propios fins que ten atribuídos a FEGAMP, esta asociación é a idónea para publicitar e difundir a existencia do presente convenio entre os concellos galegos, así como para poñer á súa disposición os instrumentos e ferramentas que se elaboren en virtude do mesmo, e que lles permitirán optimizar a estes as súas actuacións en materia de desenvolvemento económico local, sen prexuízo das actuacións que na materia ven desenvolvendo a FEGAMP.

En consecuencia, as partes comparecentes acordan subscribir o presente convenio de colaboración con suxeición as seguintes,

CLÁUSULAS

PRIMEIRA.- Obxecto

O obxecto do presente convenio é establecer as condicións polas que se rexerá a colaboración entre o Igape, a Universidade de Vigo e a FEGAMP, para contribuír, coas actuacións obxecto do mesmo, á redución das cargas administrativas no exercicio de actividades económicas nos concellos galegos.

SEGUNDA.- Imposibilidade de promover a concorrência

Motívase a utilización da figura do convenio de colaboración considerado no artigo 6.1 da Lei 9/2017, do 8 de novembro, de contratos do sector público, e as razóns que impiden a concorrência da oferta e exclúen a celebración dun contrato administrativo.

Mediante o presente convenio establécese unha colaboración institucional para levar a cabo unha actuación en resposta aos obxectivos compartidos entre as tres entidades participantes, como son os de fomentar a creación de novas empresas e promover a mellora da produtividade e competitividade das xa existentes no ámbito autonómico en xeral e no local en particular, ámbito precisamente no que está a traballar a Universidade de Vigo

colaborando cos concellos para fomentar e favorecer o seu desenvolvemento económico, levando a cabo numerosas investigacións, publicacións e xornadas formativas en materia de desenvolvemento local, para o que conta co grupo de investigación GEN (*Governance and Economic research Network*) que desenvolve a “Red Localis”.

Colaboración na que, pola súa propia natureza e en execución dos seus propios fins, intervén a FEGAMP, co obxectivo de publicitar e difundir entre os concellos galegos os instrumentos e ferramentas derivadas deste convenio, poñéndolas a disposición dos mesmos e pechando deste xeito o círculo colaborativo, ao achegar da forma máis próxima posible ao tecido empresarial autonómico en xeral e local en particular, os resultados das investigacións e actividades xerados no eido universitario, contribuíndo por conseguinte á consecución dun fin de claro interese público ao incidir directamente no desenvolvemento da política económica de Galicia, mediante a remoción de obstáculos ao exercicio de actividades de servizos e ao desenvolvemento empresarial.

Xustifícase así a imposibilidade de promover a concorrência, nun marco de colaboración que une as tres experiencias e eidos de competencias de cadaquén, para conseguir, como xa se sinalou, un fin común de interese público, proporcionando vantaxes e sinerxias derivadas desta colaboración, na que están implicadas actividades que coinciden plenamente coas que veñen desenvolvendo as tres entidades participantes.

Por conseguinte, é esta idea de colaboración na consecución do fin común de remoción de obstáculos ao exercicio de actividades de servizos e ao desenvolvemento empresarial nos concellos de Galicia, a que fundamenta a subscrición deste instrumento, por ser esta a canle axeitada, rigorosa e segura para a consecución do obxecto do convenio, a través da colaboración leal e profesional entre os asinantes.

TERCEIRA.- Obrigas das partes

Un. Obrigas da Universidade de Vigo

Para a realización das actuacións obxecto do presente convenio, a Universidade de Vigo:

1. Colaborará co Igape na execución de accións que permitan detectar os problemas para o acceso ao exercicio de actividades de servizos e o desenvolvemento empresarial en base aos estándares internacionais, así como a consideración dos impactos (cargas), tales como os obstáculos administrativos na normativa autonómica, trabas burocráticas, etc.
2. Colaborará co Igape a través da realización de propostas que podan ser tidas en conta á hora de aplicar medidas orientadas á redución de cargas administrativas.
3. Potenciará a transferencia do coñecemento e análise de experiencia a través de liñas de formación dirixidas aos concellos (mediante foros, relatorios, curso ou talleres) en materia de exercicio de actividades de servizos e de emprendemento.
4. Realizará un *workshop* coa participación de técnicos municipais, profesionais e persoal do mundo académico e investigador que permita detectar as barreiras ao emprendemento local e a posta en valor de medidas para a súa supresión.
5. Levará a cabo accións de proxección pública que permitan incardinar dun modo permanente o desenvolvemento local a partir de actuacións baseadas no emprendemento.
6. Destinará os fondos percibidos para financiar os gastos necesarios para levar a cabo as actuacións referidas nos puntos anteriores.
7. Presentará unha certificación de gastos executados para a consecución dos obxectivos.

8. Prestará a colaboración e facilitará tanta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma e ao Consello de Contas.

Dous. Obrigas do Igape

Para a realización das actuacións obxecto do presente convenio, o Igape:

Contribuirá cun máximo de corenta mil euros (40.000 €) para financiar as actuacións a desenvolver pola Universidade de Vigo establecidas no apartado primeiro desta cláusula, que se financiarán con cargo á aplicación orzamentaria e anualidades seguintes:

Aplicación orzamentaria	Ano 2019	Ano 2020
09.A1.741A.6402	20.000 €	20.000 €
TOTAL	40.000 €	

Tres. Obrigas da FEGAMP

Para a realización das actuacións obxecto do presente convenio, a FEGAMP:

Publicitará e difundirá a existencia deste convenio entre os concellos galegos, así como poñerá a disposición dos mesmos as accións, instrumentos e ferramentas elaboradas pola Universidade de Vigo, de conformidade co previsto no apartado primeiro desta cláusula.

CUARTA.- Medios humanos

O desenvolvemento das tarefas relacionadas na cláusula segunda será realizado por persoal investigador adscrito ao grupo de investigación GEN da Universidade de Vigo, e contará con colaboracións de outros profesores da Universidade de Vigo, doutras universidades e empregados públicos doutras administracións públicas.

A subscrición do presente convenio non implica relación laboral, contractual ou de calquera outro tipo entre os profesionais que van desenvolver as actividades que constitúen o obxecto deste convenio e a Xunta de Galicia, de tal xeito que non se lle poderá esixir responsabilidade ningunha, directa, indirecta nin subsidiaria, polos actos ou feitos acaecidos no desenvolvemento do mesmo.

QUINTA.- Gastos atendibles

Con carácter xeral, considéranse gastos atendibles aos efectos do convenio, aqueles que de xeito indubidable responden á natureza das actividades e fins do convenio.

Requisitos dos gastos con cargo ao convenio:

Os gastos deberán ser realizados, facturados e efectivamente pagados dentro do ámbito temporal do propio convenio e, polo tanto, no que atinxe unicamente a actuacións realizadas a partir da data da sinatura do convenio e ata o 30 de outubro de 2020, de conformidade cos prazos sinalados na cláusula sexta.

O importe do IVE (imposto do valor engadido) non se considerará gasto xustificable cando sexa susceptible de recuperación ou compensación, salvo que acredite a exención do mesmo e consecuentemente non resulte recuperable para a Universidade de Vigo.

Todos os gastos externos iguais ou superiores aos 3.000 € deben ser notificados ao Igape antes da súa contratación.

Os gastos nos que incorra a Universidade de Vigo serán compatibles con outras cantidades públicas ou privadas que puidese recibir, que deberán ser declaradas nas liquidacións do convenio, e decrementarán o importe total a chegar polo Igape.

Todos os gastos externos xustificadas pola Universidade de Vigo deben axustarse a prezos de mercado, polo que podería solicitarse unha auditoría sobre os gastos xustificadas, no caso de que non exista outro patrón de público coñecemento que permita establecer o dito axuste.

Os gastos clasificaranse en:

- Remuneración ao persoal investigador adscrito ao convenio, incluíndo persoal externo
- Dietas e custos de viaxe
- Material funxible e inventariable
- Presentación de documentos e organización de actividades, material de soporte
- Outros gastos externos que respondan de xeito indubidable á realización das actividades e fins do convenio, e que deberán autorizarse pola Comisión de Seguimento.

SEXTA.- Xustificación e pagamento

Para o pagamento das actuacións desenvolvidas, a Universidade de Vigo deberá presentar ante o IGAPE a seguinte documentación:

- Memoria xustificativa do cumprimento das condicións impostas neste convenio, con indicación das actividades realizadas, resultados obtidos e as incidencias máis significativas.
- Certificación dos gastos (segundo o modelo do Anexo I).
- Xustificación dos gastos e pagamentos: orixinais ou copias compulsadas das facturas ou dos documentos de valor probatorio equivalente no tráfico xurídico mercantil ou con eficacia administrativa, incorporados na relación do Anexo I.
- Nóminas e comprobantes do seu pagamento do persoal que participase nas actividades obxecto deste convenio, debendo acompañar unha memoria xustificativa de adscrición deste persoal aos traballos obxecto do convenio.
- Certificacións expedidas polas respectivas Administracións Públicas, que acrediten que se está ao corrente das obrigas tributarias e da Seguridade Social, así como a acreditación de non ter pendente de pagamento ningunha outra débeda, por ningún concepto, coa Administración Pública da Comunidade Autónoma ou autorización para que a Xerencia do Igape realice estas consultas polos seus propios medios.
- No caso de estar exento do imposto sobre o valor engadido (IVE), documentación acreditativa da mencionada exención.
- Declaración da titularidade da conta bancaria onde se debe realizar o pagamento, segundo o Anexo II.
- Calquera outra documentación ou material que considere necesario presentar para unha mellor xustificación das actuacións obxecto do presente convenio.

A xustificación dos pagamentos farase mediante transferencia bancaria, certificación bancaria orixinal ou extracto de pagamento. Non se admitirán os pagamentos en efectivo.

O prazo máximo para presentar a devandita documentación será ata o 30 de outubro de 2019 para a anualidade de 2019 e ata o 30 de outubro de 2020 para a anualidade de 2020.

O Igape, unha vez recibida a documentación estipulada nesta cláusula e comprobado que se cumpriu co estipulado nas accións descritas no presente convenio, procederá ao pagamento da achega estipulada de acordo coa dotación orzamentaria prevista na cláusula terceira.

En todo caso, o Igape resérvase o dereito de solicitar á Universidade de Vigo a documentación adicional que considere precisa en relación coa realización das actuacións obxecto do presente convenio para verificar a correcta xustificación do gasto e o seu pagamento con respecto ás actividades realizadas.

A Universidade de Vigo manterá a disposición do Igape ou de calquera organismo público con capacidade de fiscalización da Comunidade Autónoma de Galicia, tales como Intervención Xeral, o Tribunal de Contas e o Consello de Contas, a dita documentación, así coma todos os xustificantes dos gastos e ingresos obtidos a fin dunha verificación in situ, ben por medios propios ou mediante auditor externo. Todo isto, coa finalidade de garantir o axeitado exercicio das facultades de comprobación e control. O prazo para a comprobación material de facturas e xustificantes de gasto será de 5 anos desde a finalización do prazo de vixencia do convenio.

SÉTIMA.- Comisión de Seguimento do convenio

Para facilitar o seguimento e cumprimento do convenio, constituirase unha Comisión de Seguimento integrada por dous representantes de cada unha das partes asinantes.

A súa actuación axustarase ao establecido na Lei 40/2015, do 1 de outubro, de réxime xurídico do sector público e na Lei 16/2010, do 17 de decembro, de organización e funcionamento da Administración xeral e do sector público autonómico de Galicia, debéndose reunir cando o solicite algunha das partes.

A súa función será velar polo cumprimento das obrigas previstas no mesmo, así como propoñer a solución aos problemas que puideran xurdir. En concreto, as súas funcións serán:

- Interpretación do convenio.
- Proposta, se é o caso, de addendas.
- Intervención previa á resolución por incumprimento.
- Coordinación das funcións das partes asinantes do convenio.
- Calquera outras relacionadas co desenvolvemento deste convenio.

OITAVA.- Modificación das condicións

Calquera modificación nas actuacións recollidas neste convenio deberá ser proposta por unha das partes, directamente ou a través da Comisión de Seguimento, e formalizarase a través da subscrición da correspondente addenda. En ningún caso poderá supoñer un incremento do orzamento previsto.

O presente convenio poderá ser obxecto de modificación cando teña como finalidade o logro dos obxectivos de estabilidade orzamentaria e sustentabilidade financeira. A devandita modificación terá por obxecto a redución do volume das obrigas ou a ampliación do seu prazo de execución.

NOVENA.- Autorizacións

As partes asinantes consenten expresamente a inclusión dos datos relevantes e persoais deste convenio nos rexistros públicos que proceda, de acordo co Decreto 126/2006, do 20 de xullo, polo que se regula o Rexistro de Convenios da Xunta de Galicia, podendo exercer os seus dereitos de acceso, rectificación, cancelación e oposición respecto do contido dos rexistros antes citados, ante o Igape, en aplicación do disposto no Decreto 126/2006, estendendo este consentimento, no caso da Universidade, á autorización para a cesión dos seus datos á entidade financeira na que se aboe o pagamento.

Tamén comporta a autorización ao Igape para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda da Xunta de Galicia, no caso de que se deban presentar estes certificados en fase de emenda, logo de que a consulta polo Igape non obtivese resultado favorable; a data de expedición dos certificados pola Administración correspondente deberá ser posterior á data de consulta polo Igape, o que se comunicará no requirimento de emenda da documentación.

As partes asinantes do convenio manifestan o seu consentimento para que os datos persoais que constan neste convenio, así coma o resto das especificacións contidas no mesmo, poidan ser publicados no Portal de Transparencia e Goberno Aberto de conformidade co previsto na Lei 1/2016, do 18 de xaneiro, de transparencia e bo goberno.

DÉCIMA.- Publicidade

De conformidade co artigo 15 da Lei 1/2016, do 18 de xaneiro, de transparencia e bo goberno e o Decreto 126/2006 de 20 de xullo, polo que se regula o Rexistro de Convenios da Xunta de Galicia, o IGAPE e a Consellería de Economía, Emprego e Industria publicarán no *Diario Oficial de Galicia*, no Portal de transparencia e Goberno aberto e na súa páxina web oficial, o importe da prestación económica concedida ao abeiro deste convenio e a entidade destinataria desta, e incluírá igualmente a referida contribución e as sancións que como consecuencia deste puidesen impoñerse nos correspondentes rexistros públicos, polo que a sinatura do convenio leva implícita a autorización para o tratamento necesario dos datos da entidade e a referida publicidade, así como a súa cesión por parte do IGAPE aos órganos competentes da Consellería de Economía, Emprego e Industria.

DÉCIMO PRIMEIRA.- Extinción do convenio

O convenio extinguese polo cumprimento das actuacións que constitúen o seu obxecto ou por incorrer nalgunha das seguintes causas de resolución:

- O transcurso do seu prazo de vixencia.
- O acordo unánime dos asinantes.
- O incumprimento das obrigas e compromisos asumidos por parte dalgún dos asinantes. Neste caso, calquera das partes poderá dirixir á parte non cumpridora un requirimento para que no prazo de dez días naturais asuma as obrigas ou compromisos que se consideren incumplidos. Este requirimento será comunicado tamén á Comisión de Seguimento do convenio. Se transcorrido o prazo indicado no requirimento persistira o incumprimento, a parte que o dirixiu notificará a outra parte asinante a concorrencia da causa de resolución e entenderase resolto o convenio.
- Por calquera outra causa distinta das anteriores prevista no convenio ou noutras leis.

Se cando concorra calquera das causas de resolución do convenio existen actuacións en curso de execución, as partes, a proposta da Comisión de Seguimento do convenio, poderán acordar a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a liquidación das mesmas.

DÉCIMO SEGUNDA. – Vixencia e duración

Este convenio entrará en vigor ao día seguinte ao da súa sinatura e a súa duración será ata o 30 de decembro de 2020, sen prexuízo da súa prórroga por un período idéntico ao da súa duración inicial.

DÉCIMO TERCEIRA.- *Propiedade intelectual*

Todo o material de difusión e información xerado (publicacións, folletos, etcétera), obxecto deste convenio, será posto a disposición do Igape e deberá conter en lugar visible os logos do Igape e dos demais organismos participantes.

A propiedade intelectual será compartida entre o Igape e cada unha das partes asinantes deste convenio que figurarían como coautoras dos materiais.

DÉCIMO CUARTA.- *Natureza e réxime xurídico*

O presente convenio ten natureza xurídico-administrativa, quedando fóra do ámbito de aplicación da Lei 9/2017, do 8 de novembro, de contratos do sector público, de conformidade co seu artigo 6.1, e para calquera cuestión litixiosa que se derive do mesmo, será de aplicación a Lei 29/1998, do 13 de xullo, reguladora da xurisdición contencioso-administrativa.

O convenio rexerase polas súas propias cláusulas e a interpretación que das mesmas realice a Comisión de Seguimento, así como pola normativa xeral que resulte aplicable, aplicándose os principios da Lei 9/2017 de contratos do sector público para resolución de dúbidas e lagoas que puidesen presentarse.

As partes comprométese a resolver de común acordo calquera controversia que puidese suscitarse sobre a interpretación ou execución deste Convenio.

En caso de conflito, as partes acordan o sometemento á Xurisdición Contencioso-Administrativa.

DÉCIMO QUINTA.- *Normativa aplicable*

Para todo o non previsto neste convenio aplicarase o previsto no acordo do Consello da Xunta de Galicia do 27 de marzo de 1991, aprobado por Resolución do 18 de abril de 1991 (DOG nº 82, do 30 de abril), sobre convenios de cooperación con outros entes públicos e de colaboración con particulares, a Lei 1/2016, do 18 de xaneiro, de transparencia e bo goberno e o Decreto 126/2006, do 20 de xullo, polo que se regula o Rexistro de Convenios da Xunta de Galicia. Será tamén de aplicación o disposto no capítulo VI do título Preliminar da Lei 40/2015, do 1 de outubro, de Réxime Xurídico do Sector Público, polo que se regulan os convenios do sector público.

E en proba da súa conformidade, as partes comparecentes asinan o presente convenio por triplicado exemplar, no lugar e data sinalados no encabezamento.

O Director Xeral do Instituto Galego de Promoción Económica
(IGAPE):

Juan Manuel Cividanes Roger

O Reitor da Universidade de Vigo:

Manuel Joaquín Reigosa Roger

O Presidente da Federación Galega de Municipios e Provincias:
(FEGAMP):

Alfredo L. García Rodríguez



XUNTA DE GALICIA



Universidade de Vigo



ANEXO I. CERTIFICACIÓN DO GASTO

Convenio Igape-Universidade de Vigo-FEGAMP redución cargas administrativas

XUSTIFICACIÓN DO GASTO							XUSTIFICACIÓN DO PAGAMENTO				
Concep- to de gasto	Número de factu- ra	Data	Provedor	Importe sen IVE	IVE	Importe impu- tado ao con- venio	Documento de Pago: transferencia, che- que, etc	Data	Conta de Cargo	Entidade Financeira	Importe Paga- do
				TOTAL XUSTIFICADO							TOTAL PAGADO

Nota: agrupar os gastos por grupos de actuación/conceptos tal e como figuran no orzamento do convenio.

Sinatura e selo (*representante legal, cargo e nome*) :

Data:

ANEXO II
Declaración responsable titularidade conta bancaria

D/D^a _____ con DNI nº _____,
actuando en nome e representación da Universidade de Vigo

DECLARA:

Que a seguinte conta bancaria, da cal é titular a Universidade de Vigo, é a especificamente designada aos efectos de cobramento da compensación do Igape respecto ás actividades derivadas do Convenio de Colaboración entre o Igape, a Universidade de Vigo e a FEGAMP para a redución de cargas administrativas no exercicio de actividades económicas nos concellos de Galicia

Entidade	Sucursal	D.C.	IBAN

_____, ____ de _____ de 20____
(Sinatura do/a representante)

ANEXO III: MEMORIA ECONÓMICA**CONVENIO DE COLABORACIÓN ENTRE O IGAPE, A UNIVERSIDADE DE VIGO E A FEGAMP PARA A REDUCCIÓN DAS CARGAS ADMINISTRATIVAS NO EXERCICIO DE ACTIVIDADES ECONÓMICAS E DE SERVIZOS NOS CONCELLOS DE GALICIA**

Para a realización das actuacións obxecto do presente convenio, o IGAPE contribuirá cun máximo de 40.000,00 € con cargo á partida orzamentaria 09.A1.741A.6402.

Considéranse gastos atendibles aqueles que de xeito indubidable responden á natureza das actividades e fins do convenio. Os gastos clasifícanse do seguinte xeito:

- Remuneración ao persoal investigador adscrito ao convenio, incluíndo persoal externo
- Dietas e custos de viaxe
- Material funxible e inventariable
- Presentación de documentos e organización de actividades, material de soporte
- Outros gastos externos que respondan de xeito indubidable á realización das actividades e fins do convenio, e que deberán autorizarse pola Comisión de Seguimento.

O resumo dos custos estimados é o seguinte:

ANUALIDADE 2019	
Concepto	Contía
Remuneración ao persoal investigador adscrito ao convenio, incluíndo persoal externo	14.500 €
Dietas e custos de viaxe	600 €
Material funxible e inventariable	1.500 €
Presentación de documentos e organización de actividades, material de soporte.	2.000 €
Outros	1.400 €
TOTAL	20.000 €

ANUALIDADE 2020	
Concepto	Contía
Remuneración ao persoal investigador adscrito ao convenio, incluíndo persoal externo	13.000 €
Dietas e custos de viaxe	600 €
Material funxible e inventariable	1.500 €
Presentación de documentos e organización de actividades, material de soporte	2.900 €
Outros	2.000 €
TOTAL	20.000 €

Este reparto por actividades e conceptos é estimativo, de xeito que se poderán compensar importes sen superar o importe máximo do convenio.

A Universidade de Vigo carece de ánimo de lucro na realización das actuacións obxecto do convenio, polo que a contribución pecuniaria responde a unha compensación dos gastos que terá que soportar de cara a lograr a efectividade e execución do convenio.